

四庫全書

集部

欽定四庫全書

集部

貞白遺稿卷五

六

詳校官編修臣曹城

中書<sub>臣</sub>劉源溥覆勘

總校降調編修臣倉聖脉

校對官庶吉士<sub>臣</sub>潘庭筠

謄錄監生<sub>臣</sub>周元梓

欽定四庫全書

貞白遺稿卷五

明程通撰

詩

元旦

五雲佳氣應昌辰  
鳳歷新頒又一春  
月建丙寅時正始  
年登甲子運維新  
九重天日當黃道  
百辟衣冠拜紫宸  
嘉禮慶成蒙錫宴  
恩榮何幸到微臣

夜宴韓同年宅

王門更漏已沈沈  
此夜相逢共醉吟  
浩飲不辭非嗜酒  
清狂時發為知心  
詩因得趣聯偏好  
話到忘言意愈深  
攜手出門同一笑  
春風和氣藹儒林

敬和春景韻

東皇布德育羣生  
二月仁風遍海城  
原上草青堪放馬  
牆頭柳綠可藏鶯  
一塵不作天如洗  
萬景俱新日與明  
朝退玉階無箇事  
杖藜時向小橋行

其二

新詩同和酒同酣三月纔過十又三紅日騰光遼海上  
白雲回首大江南一生心地常攄赤八品官袍尚著藍  
君寵母恩俱未報幾回興念幾停驂

敬賀千秋詩韻

璇霄昨夜燦文星知是吾王壽且寧龍袞九章臨玉座  
鵷班百職拜彤庭香騰曉霧浮佳氣物被春風播德馨  
何幸小臣逢盛世願伸歌頌祝千齡

奉使途中

輕雲將雨洗塵泥，丹詔馳飛過小溪。  
草不知名隨處發，鳥如相識出林啼。  
韶光明媚詩情逸，道路崎嶇客思迷。  
回首親闈在何許，白雲縹緲太行西。

爆竹

此生循約束，烈性慎幾微。  
客物非無量，通玄更有機。  
當塲吐霏屑，滿眼生光輝。  
平地一聲起，傳揚到處知。

元日

丙子年

昨夜東風轉化鈞眼前歲事又更新王正肇紀庚寅月  
天運重開丙子春氣藹一元生品物嵩呼萬壽祝君親  
小臣執筆陳歌頌深媿才華不及人

其二

珊珊環佩共朝元正是皇明大統年閭闔九重深似海  
君王萬壽福如川玉階不是尋常地黃道爭傳咫尺天  
載拜賡歌酬盛德詩成應媿每遲延

其三

九重頒歷紀王正宇宙今朝又一春  
五夜仁風回草木千年佳會慶君臣  
海天浩浩皇圖廣鍾阜巍巍聖德尊  
生遇太平無以報惟知一飯不忘恩

和朱引禮韻

海宇清寧氛祲收大明於赫邁虞周  
天生聖主八千歲春到皇家第一州  
濟濟珮聲臣北面曈曈日色殿東頭  
承恩歸去添詩興倚遍東風十二樓

元宵



上元佳節幾時逢知是新春正月中香散梅花千點雪  
舞低楊柳一簾風樓頭玉漏聲從轉敕下金吾禁已通  
況喜君王恩似海人歌人醉萬方同

其二

金吾弛禁任更闌巷陌遊人自往還燈火今宵同萬國  
蓬萊何處是三山柳霞潑甕春如海梅雪沾衣夜不寒  
一笑相逢總忘寐不知身世在人間

敬和元日韻

鴻臚當殿贊朝儀百辟衣冠拜玉墀  
天地三陽開泰日華夷一統大明時  
皇皇聖主恩涵育穆穆賢王敬緝熙  
何幸小臣逢盛事承筐玉帛駿奔馳

元宵

鼇山高聳對孤稜無處無人不賞燈  
竹葉香浮銀甕酒梅花清湛玉壺冰  
乾坤月色三千界樓閣烟光十二層  
共樂太平知有自萬年洪福正龍興

較獵

赫赫王師整且齊奮揚威武保黔黎三山日馭六龍背  
百道風塵萬馬蹄士氣雄飛王氣合陣雲高壓塞雲低  
明朝得雋回營去金鼓一聲遼海西

敬廢松圖韻

山林無分著盤垠特向輿圖為現真琥珀長生千歲壽  
龍顏不老四時春金枝捧日多承蔭玉柱擎天獨立身  
大展明堂遙覲處丹青彷彿見儀神

萬馬圖

胡關汗血已成功隊隊歸來漢苑中雲散晴川芳草碧  
星馳官道軟塵紅精神摹貌一相似文彩斌斑萬不同  
伯樂何時重展顧始知神種有真龍

桃花馬

驊騮踏遍武陵春帶得繁英自滿身萬點落紅霞有暈  
四蹄攢白玉無塵自來龍種真僊種誰識花神是攄神  
醉倚東風歸洞口錯疑遊子作劉晨

松圖

甦然蒼髮數株松一夜移來堂壁中老幹尚存千古雪  
仙花不落半巖風踏枝幾悞尋巢鶴跨澗多疑出海龍  
自昔大夫榮寵後至今華翰侈遺封

元日

丁丑年

龍飛九五定乾坤寶曆春頒又一元萬國歡呼供玉帛  
五雲縹緲啟金門下情忻幸遭明主北面隨班拜至尊  
朝罷瓊林還錫宴恩波洋溢醉深罇

和胡公韻

遼國天開萬世基坐臨朔漠控邊陲君王茂對春多福  
黎庶深祈歲不饑鳴鳳來儀丹鳳闕流霞溢美紫霞巵  
仁風化日均舒暢品物熙熙藹德輝

其二

一氣回鈞萬事新由來元旦屬初旬歲除癸丑年丁丑  
月建壬寅日甲寅春滿龍顏熙日角雲屯虎旅定天垠  
忝陪東序遙瞻拜耿耿丹心拱北辰

敬和題宗譜韻

新安善政見攀轅  
況托遺孤趙祀延  
忠義一門原有自  
雲仍百代可無賢  
簪纓不乏如雲盛  
文彩猶存炳日鮮  
何幸君王為題品  
共然聲價倍當年

其二

自從五馬渡江陵  
賜第黃墩我氏興  
一本萬殊原滾滾  
千孫億子自繩繩  
箕裘紹業思無墜  
文獻傳家信有徵  
珍重王章蒙寵錫  
垂光終古照雲仍

和曹先生體民韻

邂逅相遇從容不忍離劇談當日事還動故鄉思江  
左卜隣近遼西識面遲從今永為好如髮復如絲

其二

萍水他鄉客匆匆會復離會時真可樂別後重相思天  
晚酒醒後月明人睡遲誰云我情緒曾不及遊絲

隨獵至沙河回途

西獵沙河曲東歸瀚海潯冒寒真透骨觸景動關心雲  
樹家山遠風塵旅思深前郵如有酒聊復罄囊金



義州次曹先生體民見贈詩韻

小子伊川後先生魏武孫家聲都不墜友道正堪論  
杯酒城南驛杖藜山下村相看忍相別後約在王門

宴張指揮宅座中戲答標先生觀畫韻

不到故園今四載從頭點檢看如何東風昨夜回天地  
還覺眼前生意多

和曹先生春遊韻

載酒出城去春山樂勝遊風輕雲淡淡水泮水悠悠我

幸逢青眼公無嘆白頭撫時須盡興一醉兩忘憂

義州回途懷項公詩

不見先生又許時幾回夢寐重相思應招弟子來從學  
還向親王去進詩松耐歲寒知勁節柳逢春暖長新枝  
何嘗了却公家事樽酒論文會有期

次項公韻

久客遼西苦厭塵歲寒傲過喜逢春江河二月堅冰泮  
天地一元生物新懷母愁添堂北草愛君思獻澗中芹

宦途誰是知心者，賴有斯文骨肉親。

次陳奉祠留別詩韻

有分同朝叅帝子，無人不道似神僊。  
正當遼海聯居日，又是滁陽建國年。  
馬首雲山千里遠，鳥啼烟樹百花妍。  
欲知此後相思處，月照西窗夜未眠。

次項公送別韻，就別陳奉祠諸公

百歲交情自古難，纔於好處又間闕。  
有詩留別知君厚，無物贈行非我慙。  
杯酒忍聽三疊曲，片雲知隔幾重山。

天高海濶多鴻雁無惜音書數往還

會童謝二知事因留夜飲就次詩韻

久別忽相逢交情感慨中才名今日勝情況舊時同陰  
轉柳梢月香飄花底風一樽須盡醉後夜各西東

敬和春雪詩韻

東風吹雪遍埏垓曉起推窗賞看來三白定占春麥熟  
六花不讓早梅開連營舊是青氍帳立地新成白玉臺  
誰憶長安有貧者紅爐煖閣為停杯

寄故人羅憲彰

曹館交游已有年新詩同和業同傳別來遼水東西地  
望斷山關咫尺天塞雁阻雲空問信牕雞叫月幾忘眠  
瀋陽長史如相問為道思君意惘然

次項公見示雪中詩韻

天娥剪水作飛瓊散亂隨風片片輕草木霎時春共老  
乾坤入夜晝同明藍關征馬千年事剡水扁舟萬古情  
翻笑海濱遊獵者歸來何處覓行營

其二

天雨黃金久不逢，翻成玉屑解漫空。  
都傳先臘六花見，准擬明年二麥豐。  
灞上蹇驢誇孟老，池邊鵝鴨襲吳宮。  
若教武子能寒柰，絕勝囊螢幾倍功。

其三

大凌河上喜相逢，洪武壬申十月冬。  
下榻有時曾共卧，行軒無處不相從。  
顛狂忍看風前絮，貞固深嘉雪後松。  
不但論交成白首，還期匡國盡丹衷。

憶甥金公允

異鄉重會喜何勝  
驀地分攜倍失驚  
三口能成妻子託  
百年還是舅甥情  
望迷闕樹知雲隔  
倚遍樓闌對月明  
近得好音深可慰  
聖恩還與舊時名

春日即景

乾坤淑氣正融和  
九十韶光一半過  
生意總歸新草木  
堅冰一洗舊江河  
日籠晴靄紅披錦  
水著微風綠皺波  
最喜田家得生理  
村村牛背牧童歌

敬和留別詩韻

春風花萼倍輝明，可是尋常昆弟情。  
鸞駕往來知意密，龍章烜赫荷恩榮。  
遼寧兩國同封守，文武千官盡送迎。  
徐水閭山高且遠，願言禧祚與渠平。

其二

閭阜之山秀且高，凌河之水勝葡萄。  
水光山色堪圖畫，柳綠花紅映錦袍。  
兩府東西停鶴駕，三軍先後擁麾旄。  
小臣叨在從官列，鞍馬驅馳豈憚勞。



其三

祖道宏開轡帳高  
當筵舉盞醉葡萄  
日輝棣萼霞舒錦  
風捲楊花雪點袍  
分手河梁猶駐馬  
馳心關樹劇懸旄  
問山徐水無多遠  
來往寧辭從者勞

詠松明火

生長山林地風霜閱歲深  
憑誰為傾蓋使爾竟披心  
梁棟那成用軒窗賴照臨  
大夫一封寵光彩到于今

次徐知事韻壽曹先生

春滿乾坤萬物輝先生佳誕適斯時  
仙花光動盈顛髮  
朋酒香風上壽卮戲彩有人真可樂  
杜門無事更何思  
自慚碌碌塵途客趨賀無因只寄詩

和曹先生韻

不見先生重有懷相逢一笑旅顏開  
也曾並轡春遊去  
更復連牀夜話來海上交情誰第一  
江西詩派爾為魁  
從今願託金蘭契勿謂高明棄謏才

和韓同年

詩禮承家子經筵侍講臣知公全此職愧我獨何人雨  
露恩非淺春輝德至純死生存一感得不在君親

賡詠

微生因有幸蚤歲忝陪臣自近朝中主都傳天上人才  
雖慚淺陋心只抱忠純今日翻成別何時復見親

和韻

愁蹙眉端並兩峯形容枯槁更龍鍾可憐彩服翻成布  
寧效囊錐立見鋒臣子涓埃何補報君親天地有包容

生平志願何時了能不憂心重有忡

自述

閭山蒼翠挺雙峯王氣相交秀氣鍾一水東流環若帶  
五臺西拱削如鋒乃知王業真天造况喜君恩更海容  
慚愧小臣今去國可勝忻感與憂忡

次稚周歲

去年奔道路今日奉衰麻生汝一周至感予三歎嗟桑  
弧先見志詩禮可承家唯願早成立賢能勝阿爹

次諸公見贈詩韻

忠孝男兒合兩圖如何欲進又踟躕  
王來海上初開國親在江南久倚閭  
宣力幾曾能汗馬報恩萬不及慈烏  
幾回終夜空長歎似覺中心半負初

其二

友誼如公世亦稀久交那忍遽相離  
袂當分處情偏戀馬欲前時思愈遲  
本擬雪松堅晚操奈何風木動秋悲  
深知不盡綢繆意定計青雲作後期

次韓公韻

尋常退食自公餘，坐話行吟肯暫違。  
正好協恭叅內治，不堪聞計獨南歸。  
霜花慘冽愁如緒，風木悲涼淚濕衣。  
賴有高文能發越，頓令行色倍增輝。

次項公韻

補袞何曾效寸絲，望雲空爾重懷思。  
生來兩事猶違願，話別三秋又在期。  
江海飄蓬無定跡，風霜落木可勝悲。  
也知此去重來日，桃李春明萬錦機。

和曹同官韻

書就桃符第二聯殷勤整佩去朝天五更待漏衣冠盛  
一氣回春草木鮮燭影熒煌簾影動頌聲洋溢樂聲連  
小臣何幸逢今日遙捧霞觴祝永年

和項公韻

東風破臘透先春便覺眼前生意新磅礴一元無外道  
明良千載有同寅衣冠濟濟陪鵷侶甲冑桓桓奮虎臣  
共沐仁恩何補報願勤藩輔鎮邊垠

和徐指揮韻

火城光繞御堤長  
百辟趨朝珮有鐙  
文武分陪班每近  
地天交泰運彌昌  
瓊林錫宴恩波重  
彩筆題詩翰墨香  
深羨將軍承寵異  
好殫忠赤對休光

和朱訓導韻

江梅消息兆先天  
便覺陽和布海邊  
世上有生皆德澤  
遼東無處不桑田  
蓬萊仙闕三山曉  
楊柳人家萬井烟  
真是太平新景象  
願將史筆紀堯年



和于博文韻

望極蒼旻入莽蒼蓬萊依約五雲鄉  
春回海宇開元旦日上天門麗正陽  
黃道高明王道坦玉階遙接泰階長  
經綸亦有臯夔在傑出鵷班第一行

和王典簿韻

落落銀鈎燦燦詩獨收虹彩夜光遲  
侍臣染翰供青簡中使傳宣下赤墀  
曉露均沾恩賜日春風斜倚醉歸時  
自慙報主無涓滴舞忭遙稱萬壽卮

和吳典儀韻

幾度宵衣坐達晨出門常若對嚴宸  
牀頭獨賴詩書舊天上重沾雨露新  
未有涓埃酬聖德徒工雕刻忝詞臣  
聲詩感動君王喜一笑恬然滿國春

和曹同官韻

陸地芙蓉五夜開無人不道看燈來  
六鼇背上山連海雙鳳聲中月滿臺  
風送玉梅晴有雪星流火樹迴無埃  
自憐廬處寧同賞勉和新詩當酒盃

和項公韻

太平宇宙樂黎元  
物物生生總是恩  
香逐馬蹄塵九市  
光搖鰲背月千門  
蓬萊咫尺天顏近  
遼海東南地勢坤  
自是良宵渾不寐  
寸丹還對紫薇垣

和王長史韻

萬里無雲海宇晴  
太平景象自分明  
重闕已放金吾禁  
五夜從催玉漏聲  
蓮朶光搖星斗燦  
柳梢陰轉月盤傾  
東風是處堪行樂  
王道而今似砥平

春風

春來三十日無日不東風  
入水波添綠穿林花放紅  
氣周亭毒表人在泰和中  
借問伊誰力冥冥有太空

魏澤和前春風韻

春陽開運泰一氣藹和風  
遠岫吹空翠芳塵揚軟紅  
動搖花影裏呼吸鳥聲中  
遍掃浮雲淨晴暉正麗空

和同官韻

底事年年應候來  
乾坤蕩掃淨氛埃  
挽回一氣非無力

發育羣生詎有胎弱柳窺春開翠眼落花飛雪點瑤臺  
幾翻掠海衝歸雁陣陣縱橫字字盍

和項公韻

穿林掠地盍如斯莫是東君有意為二十四番花信息  
百千萬國帝恩私園桃花發機機錦岸柳金拖縷縷絲  
忽聽上林鶯轉曉料應禽鳥得先知

敬賦雙頭蓮房

挺身已自出泥汙況復同根更並居兄弟重聞青帳幕

子孫齊見黑頭顱秋風太華名雙美夜月西湖影不孤  
喜遇時來連採納為君開抱獻聯珠

敬和雙頭蓮房

二喬相並洗紅粧含美色羞有異香一律持身分孕秀  
雙盤棒子競呈祥鏡臺對面朝朝似介冑駢頭箇箇昌  
應為防秋心亦苦重圍各自保封疆

敬和七夕韻

風動微涼几席清良宵並賞酒頻傾人傳牛女雙星會

我愛蟾蜍半郭明  
漢苑蛛絲應得巧  
玉闕雁信忽聞聲  
君王對景多詩句  
臣愧凡材和不成

和項公立秋韻

梧桐飄一葉  
四海總知秋  
已喜河山靜  
還驚歲月流  
籟聲風不定  
涼氣雨初收  
借問衡陽鴈  
飛飛若為謀

冬至

葭吹六管動浮灰  
正是先春氣始回  
君子一陽知道長  
皇王萬福自天來  
爐烟細細雲中闕  
環佩珊珊月下臺

何幸小臣逢盛事陪班又進紫霞杯

和冬至韻

聞道震雷從地復由來子月是天開歲寒然後知松栢  
春意從今遍草萊臣職無才能補袞君恩有宴敢辭杯  
遙瞻雲彩多祥瑞何用區區羨魯臺

題芮廉指揮望海圖

公餘柴立最高巔東望滄溟思惘然父也何心貪捉月  
子兮將恨抱終天長鯨一去無消息精衛高飛有歲年



此意畫圖不盡却煩歌詠為流傳

和王典簿韻

珮聲徐步上瑤池高閣稀聞畫漏遲  
餘臘都從爆竹去先春又報早梅知  
九重日月懸雙闕千載風雲慶一時  
盛世唐虞今復見賡歌纔罷又賡詩

敬和元宵韻

三五良宵春占先太平風景樂元元  
一輪光滿千分月九市燈輝五色蓮  
紫陌游龍塵裏馬玉樓醉客畫中仙

君王歡賞成佳句，高出尋常幾萬千。

和胡紀善元宵韻

結綵移來海上山，游人耽賞不知還。  
錦城信在繁華裏，紫府祇違咫尺間。  
爆竹殷雷聲起，蟄落梅飛雪解寒。  
朝端亦有登瀛者，步步春風玉珮珊。

和項公韻

聖德如天覆，幃均萬方齊。  
樂葛懷民燭，龍照夜明三。  
笙鳳吹春賽，百神銀漢月浮鼇。  
背雪玉階風滾馬蹄塵。

眼前多少生生意總是東皇一至仁

和王典簿韻

仁風浩浩播華風玉帛車書四海同  
星列官班皆拱北天臨帝座在當中  
君臣道與三陽泰宇宙回春一氣充  
皞皞熙熙名不得惟知大庇悉幷幪

敬和桃花馬圖

渥洼龍種自源源生帶桃花片片圓  
浴罷臙脂搏錦重戰歸汗血透痕鮮  
嘶風玄觀蹤難覓踏雪藍關馬不前

偏稱一鞭絲柳軟東風馳逐賞春天

和紫虛丹房二十首

北鎮間山壯且巍控臨朔漢與儋羅野無狐鼠能潛穴  
海有蛟龍或戲波花木不嫌三月少蓬萊偏近五雲多  
皇王自得安邊策何用神兵夜誅魔

其二

雨晴鍾阜捲煙綃削出芙蓉朶朶嬌龍虎盤旋千古地  
鳳凰鳴和九成簫幸逢堯舜重臨宸笑殺巢由獨挂瓢

自是我朝無棄物林泉隱逸一時招

其三

山南山北有臺萊藹藹王多吉士來三策未能專漢室  
千金何獨羨燕臺明朝道德乾坤大經世文章日月回  
慚愧微臣叨典翰牀頭筆硯肯生埃

其四

簾底微風扇底招飄然逸思共迢遙功名爭及青年立  
詩酒休將白晝消騏驥超羣終泛駕鵬鵬得志便摩霄

昔人曾惜分陰去好把膏油繼晷燒

其五

退朝行殿侍吟壇剪燭吟詩到夜殘一膽信知如斗大  
寸心還欲似天寬文章李杜齊名易勲業伊周接踵難  
深荷國恩無以報幾回興念幾忘餐

其六

有虞封後幾春秋王氣今騰冷氣收萬仞峯高雲在手  
九重天近日當頭金山倚北烟塵息遼水朝東晝夜流

臣子有懷終報國未應與世共沉浮

其七

蚤歲馳聲翰墨場君恩一飯豈能忘桂香已占中秋月  
菊老猶禁晚節霜內展經綸資治道外揚威武控遐方  
夜來有氣衝牛斗知是文章是劍光

其八

五夜天堦炳六符聖恩承運啟皇圖華夷仰日恩傾戴  
閭闔排雲許叫呼李白萬言曾倚馬王喬雙鳥解飛鳬

金匱要略卷五  
自慙學淺才如綫敢望連篇若貫珠

其九

雙峯列翠近宮城猿鶴親人慣不驚萬壑烟霞搏曙色  
五更風雨送潮聲時平不動干戈事春作方興耒耜耕  
暇日憑高重回首玉京迢遞五雲橫

其十

丹墀射策對延英騎馬看花快此情千載後無雙國士  
十年前是一書生胸蟠星斗當中貫氣與冰霜徹底清



最喜君恩容進步春風環佩響瑤瓊

其十一

幽居治業幾何年筆耒為耕紙作田雲路有梯終穩步  
靈臺無物自虛圓楊花解作三春雪榆莢空飛九府錢  
堪笑子陽非遠見區區只認井中天

其十二

磊落胸懷燦若璣乘風直欲叩重扉函關幾日青牛度  
華表千年白鶴歸頃刻開花那見種等閒栽橘便成園

莫言幻語驚盲聵信有先天造化機

其十三

林花雨過錦成機  
岩壑雲生石有衣  
烟外數村牛馬息  
天中雙闕鳳凰飛  
清朝蜃氣連滄海  
薄暮鐘聲出翠微  
幾度倚闌吟望處  
翛然得意竟忘歸

其十四

惜昔春秋似奕棋  
而今喜遇太平時  
千年泰運乾坤闢  
萬里仁風草木知  
王國分茅仍胙土  
皇家玉葉與金枝

寧邊莫道無籌策麾下英雄總健兒

其十五

清若冰兮直若弦行須方正智須圓寸心向日終殫赤  
兩鬢成霜不再玄挾策每懷為世用遺經還自得家傳  
材官誰似揚雄者獨步河東賦一篇

其十六

燈窗獨坐夜忘眠細玩揚雄草太玄洞裏有天非小景  
山中無地不長年向陽花木知春早近水樓臺得月先

妙趣悠然真自得何須呼酒說龍泉

其十七

四時代謝迭寒溫閭闔陰陽不二門天上碧桃應有種  
月中丹桂本無根海容川會方成大渭合涇流未免渾  
爭似靈臺明耿耿尋常不受一塵昏

其十八

海上風來夏不炎況多時雨送涼添雲收朔漠三千里  
露出閭山一兩尖垂柳道清鸞捧駕落花泥軟燕穿簾

夜深獨倚闌干望玉桂東南半廓蟾

其十九

宇宙茫茫無始終遼西開國壯王宮鳳聲清夜雙簫月  
牛背斜陽一笛風波浪不生滄海靜雲靈都散碧山空  
太平無事民安業會見陳陳粟腐紅

其二十

華發蟾宮第一枝西風八月正中時三場我已曾酣戰  
一字誰云不療飢龍種自來天上出豹斑未許管中窺

金少川八十二  
不須更問承恩處浩浩波光滿鳳池

贈齊千戶奉喪回葬江西饒州

嚴父騎鯨飛上天承家尚有子英年一官護衛參王駕  
萬里奔喪問客船遶海月明驚鶴唳芝山天相得牛眠  
故園裏事母留戀忠孝男兒要兩全

敬和蘆花韻

漁村近遠鶴汀傍一陣風來一陣狂蒼雪捲晴江月冷  
白雲收影水天長海鷗衝落頭先白塞雁銜來喙亦香

釣叟夜深迷却路歸舟帶得半帆霜

正旦

璇璣懸幹有神功一氣潛回十日冬寶曆天頒春正月  
車書雲集大明宮三元令節三陽泰萬壽君王萬福同  
臣忝駕班遙拜賀珮聲隨步玉階東

和鍾紀善韻

十日春來十日晴正宜扈駕歷邊城松篁不逐春風媚  
花萼相輝晝日明雙鳳齊飛雲錦麗六鼇不動海波澄

回朝正笏詳數奏天下如今已太平

和前韻

萬里雲收海宇晴海東月照海西城金盃滿泛春霞暖  
絳蠟高烧午夜明閭阜晚峯青簇簇遼陽春水綠澄澄  
箇中風景堪行樂何幸叨陪際世平

和靖江府胡典儀韻

駕扈游諸國經秋又涉春關山知有許瀚海闊無津古  
塞風光別長亭月色新論詩勞獎借一語重千鈞



敬賀元日韻

泰運君臣共履端  
弘敷五福兆民安  
天開夏正壬寅統  
氣轉春陽甲木干  
五色祥雲舒鳳翼  
萬年壽酒上龍顏  
微臣瞻仰勤三祝  
社稷尊崇等泰山

敬和元宵詩

燈月樓臺遠近間  
千門萬戶不須關  
謾歌白雪無雙調  
穩步青雲第二山  
酒色暖涪春色嫩  
梅花晴袞雪花寒  
太平同樂惟瞻仰  
咫尺天顏是聖顏

元宵

雲淨天空月正高  
迢迢良夜遇元宵  
蓬萊五鳳盤雙闕  
瀛海三山駕六鰲  
紫陌香塵隨寶馬  
玉樓美酒換金貂  
太平樂事知無外  
但恨樗材答聖朝

和靖江府鍾紀善韻

馬蹄轍跡遍天垠  
開國承家喜有人  
自古金陵多王氣  
當今紫塞少氛塵  
鰲頭跨海放懷闊  
馬上看山得句頻  
濟濟從官多似雨  
長楊有賦莫如君

其二

遼東望江左蕩蕩是天衢日侍親王駕雲從長者車歌  
曾誇白雪酒不羨黃壚歸向朝端說今吾非故吾

其三

滁陽省視又遼陽明日都門促去裝龍馭九重瞻日月  
馬蹄萬里踏冰霜來時朔雪山陰白歸路東風柳色黃  
謠俗已知君採納回朝數奏達明光

三月廿五連瀛登樓晚眺

公餘同上驛門樓倚遍闌干縱遠眸秦嶽數峯天外起  
黃河一帶水東流舟橫古岸人爭渡草合平原馬未收  
矯首鄉關何處是暮雲迢遞隔南洲

題孫允剛飲水軒

智者惟樂水樂之斯飲之清貧自足樂真味誰能知江  
海歸吾量膏粱匪我思孔顏今不作千載竟何師

題方宗義先生石友軒

交際誰非友堅真孰似他訂盟知可久修業賴相磨懷

玉為時重顏蒼閱歲多朝花夕變色於此却如何

壽王詩三十二韻

乾坤開泰運日月麗皇明聖主隆昌胤賢王喜誕生虹  
光流遠渚星影煥長庚御闕千祥集輿圖萬象呈鳳雛  
稀世出龍種自天成文武才兼濟經綸學更精金枝連  
玉葉棣弟及棠兄筆底揮珠玉胷中富甲兵分符宜受  
命屬籍早題名胙土三韓廣宸章九爵榮神威清北塞  
王氣接南京天啟雄藩地雲屯細柳營坐朝端黼黻為

國秉鈞衡納諫開言路推心悅衆情和風施化雨善政  
藹仁聲德勝丘山重恩覃草木輕華并夷一統河與海  
雙清鑿序興絃誦田園遂鑿耕隴雲秋有望烽火歲無  
驚皞皞無懷氏熙熙葛天民四維同鞏固萬世保昇平  
矧茲羣執事總是一時英朱紫輝袍錦璫珎曳珮瓊羽  
旄參鶴駕象管答鸞笙絳蠟蓮萼燦霞觴竹葉傾五花  
西域馬百疇上林鶯報曙傳雞唱賡歌宴鹿鳴微臣何  
大幸平步似登瀛莫既揄揚力惟深頌禱誠佳辰多吉

慶洪祚永康寧遼水水光綠間山山色青願將此情意  
敬上八千齡

古風慶王壽

太極昔未判一氣渾渾然清濁既已分萬象何昭宣高  
者為天為日月下者為地為山川其間昆蟲與草木林  
林總總幾萬千若夫稟二儀之秀氣奪萬物之精妍生  
具四端備百行虛靈挺秀為人焉中有最靈與最秀首  
出庶類惟聖為能全天生聖人豈徒爾亶聰明作元后

父母乎黎元大哉吾王繼立極聰明卓冠天下先神聖  
廣運堯蕩蕩日新夕惕湯乾乾躬翊明主膺大任統一六  
合清三邊大開明堂受朝貢東夷西戎南蠻北狄萬國  
玉帛來源源鞭策唐宋軼秦漢進與虞周三代為比肩  
上天眷命益用懋福祿膺祚恒綿延龍子龍孫自有種  
金枝玉葉春相鮮分茅胙土法古制王章九爵袞冕先  
蟬聯秦都關中晉雲內荆衡齊代并幽燕下逮岷峨巴  
蜀二十有餘國莫不犬牙相制唇齒相牽連睽茲遼陽



作巨鎮提封千里際海堧坐臨高麗控朔漠襟帶潮海  
通雲烟吾君奉詔莅茲國措置社稷磐石堅春秋祀事  
竭誠敬撫恤黎庶加慈憐遼天雨露灑湛恩及蚺獯恪遵  
王度靡頗僻佩服祖訓常恭虔乃文乃武才兼濟惟精惟一  
學更專橫梁跨馬耀威武投戈講藝宏經筵況有如貌  
如虎桓桓之將士又有如駕如鸞之英賢同寅協恭贊  
厥美夙興夜寐相周旋皇風清夷海宇靖佇見民庶高  
枕皆安眠行者願出於吾途居者願列於吾廛仕者願

立於吾朝耕者願業於吾田堯民何皞皞周道何平平  
牧童牛背歌日夕騰垓埏豈不見東平蒼竹帛千古芳  
名傳又不見城陽章功績萬載金石鐫吾君仁德早拔  
萃彼二者不得專美於其前欣逢令旦當今日正是二  
月中和天祥雲裁錦弄曉霽扶桑暖旭高枝懸一元塊  
圮妙化育品彙孰不歸陶甄遐邇臣隣率歡賀承筐篚  
厥黃與玄綵杖綴班森玉筍絳紗籠燭燒金蓮醉路宮  
花壓帽重迎風象管鳴繁絃上林流鶯聽曉睨翻堦舞

鶴看蹁躚葡萄滿斟光祿酒蟠桃佳宴瑤池仙太平盛  
事親幸親直欲播頌焉得巨筆如長椽區區韋布士詞館  
叨備員既乏八斗才安用五色牋但歌天保詩答此鹿  
鳴篇願祝吾君壽如山山高翠拔閭阜巔願祝吾君福  
如水水長玉掛雙峯泉閭山泉水高遠亘今古願祈國  
祚相與悠久億萬千斯年

送項公回浙江祭祖

河頭楊柳青絲絲臨河送別攀柳枝百官騎從密如雨

何異畫工圖畫之舉鞭欲發向南去極目天台渺何處  
擔頭詩卷燦可觀鐵網捲去珊瑚樹羨君富貴歸故鄉  
衣錦白馬春晝光大丈夫壯志有如此忠孝兩盡名斯揚  
茲行不負平生願奚惜風霜經歷遍百年丘隴頓生輝  
九族宗姻重會面追憶離家六七年歸來松菊猶依然  
何妨斗酒悅情話掀髯一笑東風前瓊臺雙闕雖云好  
未許優游直終老祇恐王庭注目長束書早上江南道

其二

六載交情海樣深  
臨溪那忍遽分襟  
錦衣已遂還鄉愿  
白髮愈堅報國心  
晚日客停鶯哈哈  
東風官路馬駸駸  
囊中莫道無餘物  
御墨文章價萬金

敬和文房四寶

商盤周鼎鎮神州  
寶劒森嚴雜佩鈎  
篆出籀斯能有幾  
法推羲獻更無儔  
長戈壯士千鈞力  
樹老寒藤萬丈頭  
劃若蛟龍動風雨  
天池飛躍肯淹留

敬和尚義堂詩韻

臣子須知仁義先敢云卑末兩能全側身天地求無愧  
托迹培塿莫有傳擬易漫同揚子宅憐貧安得范文田  
君王下贈瓊瑤句蓬壁生輝韻更綿

敬和萬馬圖

高蹄駿馬萬為羣異色殊形賦與恩功著丹青身外事  
毛殷汗血暈邊存草堤折隊疑星散沙道成行若電奔  
想是平胡多効力圖形千古照乾坤

和十六府徐紀善韻

駕駘馬敢趁驂騑深愧相從逐去舟藩輔樹勲誰第一  
殿廷射策爾為頭風濤何事羈行色景物從教動客愁  
今日浪平川若練片帆摇曳過邳州

和十八府翁紀善韻

幾年燈火讀書勞一旦名成地位高身輔東藩攀鳳翼  
風搏北極快鴻毛皇風漸海遠沾化白日當天明見毫  
好向青雲樹勲業羞談林下許由瓢

和翁紀善韻

雲隔東江遠風高塞北寒遊人歸未得愁思滿征鞍

隨駕幸教場

亞夫營畔柳青青車駕時臨演武亭  
貔虎嘯風生氣燄旌旗耀日赫威靈  
彎弓疑掛半輪月流矢如飛萬點星  
老我日陪仙仗側歸來無事坐談經

春三月奉使臨清

三月正當初一日驅馳王事上臨清  
馬蹄踪跡追風去錦服聯翩照日明  
花不知名隨路發鳥如相識向人鳴



行行西出榆林外，纔過長亭又幾程。

較獵

草深春暖馬初肥，較獵平原曉合圍。  
聲振乾坤雷萬鼓，影搖山嶽火千旂。  
蒼鷹攫兔林間下，野雉驚人馬首飛。  
擊射競誇誰得雋，凱歌齊向月中歸。

元宵

禁城閭闔九重開，歌舞諠譁六市來。  
人物英雄龍虎地，笙簫清徹鳳凰臺。  
喜看午夜十分月，不動春風半點埃。

坐對良宵無限興侍臣頻進紫霞杯

錦谷程時傑休寧汪用和俱客遼東時傑之歸  
也用和以墨梅相貽索予題贈

舉世送行皆折柳汪君獨贈一枝梅寄將春色江南去  
更喜幽期夢裏來青眼故人歸錦谷縞衣仙子下瑤臺  
相逢欲識東風面一度披圖見一迴

送唐孟實還績溪

冰霜嚴冬月在丑客邸蕭條獨株守掩卷暫向橋門行

忽然遇我平生友  
掀髯一笑臨風前  
殷勤詢問同攜手  
舉杯聊慰別來思  
夜雨西窗頻話舊  
況復遺我蒙山茶  
亦欲報之乏瓊玖  
明朝送別龍江頭  
一首新詩一卮酒  
來時密雪綻紅梅  
歸路東風舞官柳  
到家如見交游者  
道我問訊今安否

春日聞唐比部將至荊州

每憶唐求思渺然  
別離何似路三千  
今朝喜得南來使  
報道相逢二月天

其二

幾載相逢見面難祇憑尺素報平安江陵不日君須到  
春月春花好共看

貞白遺稿卷五

欽定四庫全書

貞白遺稿卷六

明程通撰

詩

送陳君還池州省親

江亭攀綠柳送子遠歸寧檐上一詩軸沙頭雙玉瓶青  
衿辭上舍綵服拜中庭預約重來日秋風桂子馨

慶太守門人韓淵侍親其兄從戍故弟得以歸

養

二妙武文異一門忠孝俱青宮陳奏牘綵服照庭除  
鯉晨調饌焚膏夜讀書他時樹勲業遠大志何如

送劉觀文歸廣東省親

南雄自昔多才傑上國于今識俊英三載賢關時雨化  
片帆江浦暮潮平風生丹桂秋天爽露滴金莖夜氣清  
綵服翩翩拜家慶須知忠孝足揚名

題石鏡

表裏空通一片明不磨不拭自天成半空壁立山川秀  
萬古光涵日月精春暖野花裝異態夜寒山鬼泣真形  
何當貢入歸天府縱使奸邪孰適情

勤學

高齋盡日不吾局勤學存心在六經黃卷千篇深屬意  
青燈一點漫勞形何須苦映孫康雪更憶曾囊車子螢  
窗下十年堅篤志會須奏對立王庭

立春

斗杓逢丑又回寅且喜今朝慶立春  
歷自天朝頒正朔陽隨地氣轉鴻鈞  
人人共迓三陽至處處咸欣萬物新  
從此書生勤努力文章應不負吾身

午夢

深院無人夏日長北窗高卧擬羲皇  
筆文如水侵膚冷鼻息如雷隔屋揚  
宰我晝眠悲朽木壺仙市飲悟黃梁  
遙知富貴真如此一枕松風六月涼

懷古



乘暇須登百尺樓興亡滿眼思悠悠天高地下今猶昔  
暑往寒來春復秋世事無情毛鬢改關河有路利名憂  
遙思廣武英雄日赤壁烟消酒一甌

元夕

金鎖橋門總不扃上元佳節雪初晴一輪璧月中天滿  
萬點華燈徹夜明鼇駕海山開曙色車隨仙仗鼓雷聲  
書生幸際風雲會環珮遙知集鳳城

蘭亭懷古

節序催人易易過蘭亭遺跡竟如何當時豪傑風流盛  
曲水杯觴樂意多渺渺闕河天日別茫茫宇宙惠風和  
文章千古留遺記一讀令人發浩歌

夏夜

南風吹我襟獨坐邀明月心事寄朱絃可對青天說

秋夜

斗轉銀河久窗虛玉露寒夜深明月裏夢繞五雲端

送周生

把酒立離亭柳色正青青君逐衡陽雁迢迢過洞庭

題存心堂

方寸之間本自然尚期操守要精專尋常莫放一毫地  
咫尺應馳萬里天泰宇日間雲寂寂靈臺夜靜月娟娟  
堂前揭扁昭曩訓舉日常如對聖賢

題綠照亭和韻

綠照亭前景物都白人何用說西湖雨餘春樹翠如染  
雲淨曉山青可圖近水有窗先得月凭闌無客不提壺

莫辭爛醉扶歸去王道于今似坦途

賞春

負却韶光知幾年偶從村館對尊前酒中春色歸人面  
風送花香入几筵俄覺三春過二月休論一斗直千錢  
人生行樂應能幾醉後何妨伴月眠

送施旦歸湖州

梅雨微腥風自南留人檣燕語呢喃幾年館下思歸客  
此日江頭掛去帆蓬嶽峯聯雲朶朶雪川水急石潺潺

高堂獻壽稱觴日紅藕花香襲苧衫

題汪宗哲綠猗軒

繞屋琅玕秀翛然一徑深迴無塵俗氣獨有歲寒心夜  
雨箨龍長春風彩鳳吟何時一相訪到此洗煩襟

送童正蒙歸涇川省親

攜手話新別殷勤酒一觥雲橫親舍遠風送客帆輕錦  
軸題詩富斑衣照眼明升堂拜家慶應足慰深情

寄余舜卿和韻

遁跡林泉傲歲年柴門三徑竹娟娟樽開北海客時過  
日向東窗人尚眠對月每懷犀玉表因風忽墜錦雲箋  
鳳凰臺下思歸客何日重回乳水邊

寄春坊汪魯齋先生

曉列丹墀第一班從容告老許休官  
退辭鳳闕榮冠蓋歸把漁磯舊釣竿  
臺閣文章當世重山林風月此身閒  
秋來喜有南征雁聊寄音書一問安

寄周知縣汝楫和韻

溫如春煦凜如秋王事惟勤靡慢遊系出濂溪家學在  
澤敷乳邑治才優關河有便書空寄公館無私恩莫酬  
十二樓頭明月夜倚闌無任獨綢繆

歲寒三友

萬木凋零色已非獨留三友共為期生無桃李春風面  
總是冰霜晏歲姿士到窮時存節義物從靜處見真機  
高人不厭相看處默坐幽齋漫賦詩

立秋

冉冉光陰逝水流斗梢明夜轉清秋乾坤已覺炎威退  
枕簟應知爽氣浮出塞飛鴻離北漢辭巢語燕過南樓  
井梧最是知消息一葉飄飄不自由

雪獅

連朝飛雪滿山城堆琢誰為白澤形牙爪有威身似玉  
頭顱無角眼如星瓊瑤冷浸熊羆懼風雨寒凝虎豹驚  
盡日庭除真可愛不聞聲吼若雷霆

青山白雪



一夜嚴風透客窗曉來六出遍穹蒼青山上下如銀飾  
綠樹高低似粉粧嶺畔寒梅添素白堤邊嫩柳失妖黃  
高人極目情無際收入詩囊賦短章

冬日閒行

歲晚天寒旭日晴出門乘興小郊行白雲望斷關山路  
黃葉愁添故國情事業正須酬壯志詩書應不悞儒生  
歸來茅屋吟哦久又見梅花月色明

贈陳太守

萬丈文光貫斗牛  
新安太守詫賢侯  
朱旂影動溪山曉  
紫府清聞天地秋  
六邑蒼生蒙化育  
三年芹泮賴崇修  
明時暫袖調羹手  
指日承恩拜冕旒

寄春坊汪魯齋先生

曉殿香風散玉除  
春坊旭日照華居  
出膺紫誥儕三老  
歸賜黃金蹕二疏  
館閣文章新體製  
山林風月舊琴書  
芙蓉絳色青於染  
何日樞趨訪隱居

投壺

佳客乘閒興味清  
投壺深院響鈴鐺  
飛梭躍矢心身正  
定鼎論籌揖讓明  
賓燕始終施舊禮  
雅歌歡笑罰深觥  
祭遵昔日雖軍旅  
對爾猶堪悅性情

禪房夜坐

乘興閒登萬仞山  
老禪迎宿縱清談  
燈燃金粟紅光燦  
座擁青蓮寶像涵  
鶴放芝田歸靜院  
龍降秋水伏深潭  
終宵月色如明晝  
月斷前峯鎖翠嵐

送金別駕赴廣州太守

早承飛檄覲宸旒又拜麟符鎮廣州清氣遠臨蠻草地  
大星光動海山樓一鞭行馬離京國萬姓知名迂郡侯  
練帶花屏山水郡幾多恩澤為君留

鼓琴

風暖庭間晝景沈焚香默坐鼓瑤琴七絃雅操胸中出  
一曲琅然指下音清韻別傳仙客意和聲盡見古人心  
子期去後今千載流水高山何處尋

芙蓉

一種芙蓉獨自芳數枝開向小池傍妖嬈艷色含朝露  
寂寞幽容拒曉霜西子有懷酣晚節楊妃無語占秋光  
江南九月蕭蕭雨醉臉還愁褪晚粧

惡蚊

旅館踈窗暑正炎飛蚊無數惱人眠成羣夜出晴簷下  
逐陣雷鳴客枕邊任是終宵高秉燭也須微暮畧薰烟  
乾坤幻化何時息直待西風九月天

老人星

靜夜沈沈月色明遙瞻南極老人星祥光分映連牛斗  
瑞彩生輝耀丙丁永為君王符萬歲式同臣子際千齡  
昌圖肇運雍熙治皎皎橫河四海寧

送人赴舉

持杯送別思悠悠行赴科場禮最優官樣文章生筆底  
巍然名譽占鰲頭十年事業成功早萬里鵬鵬得志秋  
龍虎臺前須宴賚金花照耀日光浮

寄彬上人

高僧話別憶匆匆欲寫相思意萬重乳水澄泓涵夜月  
石門幽勝隱仙蹤寺深廣福應難到路入楊溪莫易逢  
何日乘閒一相訪共聽清論說降龍

送友歸養

幾年芹泮共翱翔奉旨承恩返故鄉鶴髮倚門欣具慶  
荆華盈樹喜聯芳尚原松菊存三徑乳水才華冠一邦  
從此束書歸舊隱會將潛德播馨香

夢萱吟

朝望天南雲暮思北堂老展轉不得寐惻然傷懷抱有  
夢到門閭宛然見萱草秋風忽披拂顏色寧復好覺來  
坐蓬窗憂心有如搗汨墜霑衣裳天空月正皎

寄方希古

杜若滿芳洲懷人獨倚樓江天烟樹迴漢水暮雲浮氣  
節惟吾友才華孰汝儔金陵分手後遠念日悠悠

贈余侍御

余子平生友朝端孰汝儔直聲聞海宇正氣挺神州月



照烏臺曉霜凝白簡秋清時封事少何以報宸旒

贈黃太守

皇明一統大書元正值邦侯入覲年五馬嘶風行白晝  
六龍扶日上青天朝中禮樂衣冠盛閣下文章政事全  
莫道潁川功第一古今何代不生賢

其二

文章太守孰能儔五馬分符古列侯騎從偶然過績邑  
鯁生何幸識荊州橋頭楊柳春先得江上蘆花雪未收

朝罷君恩應借冠莫教父老永凝眸

寄黃侍御克敬謫歸

一封直上謫滎陽三徑歸來菊未荒  
白髮喜沾新雨露烏紗猶帶舊風霜  
梅梢初月供詩卷溪上閒雲伴釣航  
莫謂山林真可樂徵書還恐下巖廊

送李志寧歸省

孝子別成均南歸楚水濱  
檐頭綳帙舊庭下綵衣新  
去路江梅馥來時禁柳青  
都門頻送客我亦倍思親

送詹觀歸省

歲聿云暮雨雪霏霏君辭壁水將馬歸片帆縹緲過龍  
江龍江勿遊蕩重闌倚門望

歲聿云暮雨雪載塗君辭壁水將馬徂片帆縹緲過東  
吳東吳勿盤桓急歸為問安

歲聿云暮雨雪其雩君辭壁水歸故鄉片帆縹緲穀溪  
傍溪傍凍不流行人此停舟

送朱大使朝京回迎父往福建任所

三載官南閩寸心戀北闕玉珮朝龍顏斑衣迎鶴髮山  
青雲自閒梅黃雨初歇別後天一方相思共明月

舟中阻風

不向亭衢跨紫騮却從江上駕扁舟風吹駭浪花翻雪  
雨壓低篷人倦頭一日行時三十里寸心懷却萬千愁  
明朝水淨天無際高掛雲帆出北州

過呂梁洪

舟過梁洪信險哉中流屹若勢崔嵬狂瀾震盪翻三級

怒氣犇騰鼓萬雷  
如禹施功道跡在  
盧公有記古碑頽  
人間奇險應如此  
不特瞿唐灩澦堆

過韓氏先塋

之人騎鶴上蒼冥  
遺塚累累草自青  
今日松楸成枳棘  
當年勲業在朝廷  
謾詢故老家無類  
猶見先賢碣有銘  
餘恨不隨流水去  
行人嗚咽不堪聽

東阿道中

江南遊子茂才華  
此去之官水陸賒  
行旆幾時辭日下

客舟今夜到天涯東風驛路聞啼鳥落日煙林舞亂鴉  
矯首東昌纔咫尺料應清夢遶皇家

夢還家

故鄉南望路偏賒清夢無時不到家僮僕出門迎舊主  
稚兒環膝獻新茶庭前萱草春仍綠階下長楊暖正花  
驚覺不勝愁絕處柳梢明月照窗紗

北地塵

平沙萬頃浩無垠一陣風來總是塵初訝瘴烟昏白晝

又疑宿霧翳青旻風前欲語難開口馬上相逢不見人  
何日乞歸優詔許清泉白石與為隣

別方希古

海內交遊更許誰百年心事藉君知江陵他日芭蕉雨  
應憶城西送我時

送王大參

柳色綠堪把桃華紅未齊君歸江南去芳草正萋萋

舟夜

金史四庫全書  
卷六  
灘聲撼月嚮西風木葉蕭蕭到短篷無限秋懷孤枕客  
村雞啼曉水雲中

送舒侍御

東風收積雨旭日麗江城青絲繫玉壺送客上神京春  
陽散淑氣高柳啼新鶯相攜一杯酒展此平生情如何  
別我去迢遞尊王臣征車隨短劍祖帳開長亭當杯易  
為別後時那可盟回首客窗夢闕河共月明

舟次瀟湘



碧水連秋漢丹楓映夕陽扁舟歌楚些早晚下瀟湘

舟晚

江闊山容渺天空樹影微孤舟明月夜南望白雲飛

送夏僉憲

昔別在京國今逢漢水湄十年又相見倏忽又別離河  
山淑氣轉桃李春風吹撫景豈不樂而與故交違驅車  
向何許還望東南馳留君不可住送君一淒其寂寞羈  
旅中殷勤勸一卮分手無以贈聊此涼薄辭

途中漫興

手承丹詔出京華  
驚見途中景物嘉  
官柳翠於橋下水  
野桃紅勝日邊霞  
客懷已覺塵埃苦  
王事寧辭道路賒  
野老亦知天使至  
旋呼童僕煮清茶

送解大紳

九重丹詔下徵賢  
驛騎旋飛又著鞭  
壯志先凌鵬海外  
驪歌疊唱鶴祠前  
聲名振達雲霄上  
文彩光輝日月邊  
鴻鷺齊班榮寵渥  
羅衣新惹御爐煙

二月七日舟過桃源先是連日風浪至日恬靜  
因而有作

連日驚濤勢拍堤晚來恬靜喜無涯水聲擘舵舟行疾  
月影滿牀人睡遲雙櫓咿啞驚驚宿片帆搖曳逐風飛  
篙師撾鼓歌纔罷報道于今到下邳

為葛士延題竹

鳳集庭前更引雛風翻翠尾任扶疎有時彷彿聲敲玉  
靜聽如何却又無

其二

幾竿晴影翠重重  
遠近猶分淡與濃  
傳入畫圖移不去  
幾迴疑對月明中

其三

幾箇疎篁清復曉  
曉來帶雨葉縱橫  
如何幻跡銀箋上  
靜定無聲似有聲

其四

詩家遶逕長新篁  
解籜抽梢箇箇長  
高士筆精歸尺素

醉中疑是對瀟湘

為蕭尹題墨梅

屈鐵為根玉作肌  
移栽不記幾何時  
東風昨夜回天地  
開遍牆頭一兩枝

舟中

久客衡陽道深秋  
漢水涯千山靈雨息  
孤棹晚風移疎葉  
蕭蕭下浮雲片片隨  
長吟懷宋玉心事遣誰知

菊澗歌寄贈許子

幽人抱道羣山麓臨澗手植千朶菊石澗水溢湧金波  
燦爛光射幽人屋滄英酌泉避俗諠笑傲羣山無寵辱  
適爾羣芳搖落時幽香喜噴滿東籬閒將白眼看塵世  
細和淵明歸去辭

荊州登樓

倚城高閣映湖天此日登臨一捲簾翹首忽生千里思  
慈顏一別又三年

其二

峴首山邊秋草生  
巴江水上暮雲橫  
北堂迢遞空南望  
一度登臨一愴情

題練溪閒居卷

銀絲滿鬢手扶藜  
此日承恩隱練溪  
倚檻漫觀春浪激  
杜門閒對曉雲低  
上林曾聽嬌鶯囀  
御苑空思匹馬嘶  
最有悠然真樂處  
鳶飛魚躍入新題

題黃克文先生竹溪圖

秀色娟娟翡翠滋  
溪邊新長拂雲枝  
明年一日春雷動

正是飛騰變化時

題白雲丹室

白雲丹室好修真雲與仙家本自親無意從龍施黑雨  
有時騎鶴上青旻只燒鼎內千年藥不著人間半點塵  
何日相尋參寶訣碧桃花下醉長春

瓜洞鍾靈

脉自崑崙體氣分悠悠到此聚瓜英花開洞口藤餘艷  
泉落雲根露欲凝礬石不如些箇潤青門何似此中馨



謾矜天意呈佳致須信人豪本地靈

寄汪育德齋

獨倚江樓思愴然鄉心每與雁爭先吳山楚水隔千里  
紅葉黃花又一年自嘆微才終後學敢圖清譽繼前賢  
來書過爾相推許寧不懷慙祖逖鞭

其二

霜落吳江錦樹稠數聲鴻雁海天秋來書已盡鄉中事  
對景惟添客裏憂烟烟丹心思報國星星白髮覺盈頭

人間回首深愁困何日煙塵淨北州

其三

往事休論釣六鼇鄉心日日念同袍  
雨餘種藥連瓊圃風裏聽松響翠濤  
湖海宦遊人獨遠丘園養素道彌高  
自嗟碌碌成何補雙鬢年來已二毛

其四

翠眉山下地仙家門倚清流路轉賒  
夜靜有時瞻北斗日長無事註南華  
橘泉秋雨涓涓玉杏園春風樹樹花

念我江湖為客久何時歸共醉流霞

其五

公餘閒步楚江濱何日歸舟為問津  
千里有懷嗟遠道一官無補賴同寅  
嶺雲關樹頻年別岸草汀花幾度春  
料得故園桃李共李幾枝烟雨映城闌


送趙子藝歸侍

趙氏子藝孝且賢讀書胄監當青年  
深念重闈垂鶴髮白雲縹緲家三千  
定省久疎曠旦暮心悃悃攄情達天

子優詔許言旋臨風把酒別師友馬首西向敲金鞭歸  
路梅花發清馥到家桃李爭春妍上堂奉甘旨綵衣舞  
蹁跹椿萱照丹桂斯樂何如馬願言奉歡有餘力青燈  
黃卷尤精研寸草春暉志已遂好樹勲業青雲邊

輓章生文喜

學不成名志肯休奈何天意拂人謀封章未達黃金殿  
作記先登白玉樓夜雨西窗閒筆硯秋風荒塚自松楸  
十年高誼今安在不覺沾衣涕淚流



貞白遺稿卷六

欽定四庫全書

集部

貞白遺稿卷七至十

詳校官編修臣曹城

中書臣劉源溥覆勘

總校降調編修臣倉聖脉

校對官庶吉士臣潘庭筠

謄錄監生臣周元梓

欽定四庫全書

貞白遺稿卷七

附錄贈言

賜寅賓堂詩序

以下並遠王作

洪武二十九年歲在丙子中秋之前三日吾遊於程紀善之寅賓堂勸士也於是羣彥時至逢掖雲集此地有藝苑文房明牕淨几又有東壁圖書西筵經史作而為官樣文章大方家數雖非壁水泮林之比至於賡歌詩



賦良可以作興世教陶冶性情是時也水天一色風月  
雙清貴三才有一德之咸富萬卷無異端之習所以注  
目游心騁士君子素位之懷信可樂矣夫寅賓之典誠  
非偶然蓋方取暘谷出日之初義則存出門迎客之敬  
君臣契合天人符應雖古今不同地位稍異當其惟敷  
學半一啟一沃交修有道僉辭允諧揖讓之間庶績咸  
熙矣古之記室今之贊善互司厥職念皇上有訓導我  
以仁永王之國豈虛語乎丹書云敬勝怠者吉怠勝敬

者滅義勝欲者從欲勝義者凶儆戒無虞罔失法度寅  
賓豈無謂哉古人又豈欺我哉然猶記疇昔之歲嘉賀  
族譜羨其尚義惜其南歸并賦諸題以與之以今方書  
之得非肇于前而嗣於後耶吾安得不為之抑揚載歌  
而激昂之是為序

寅賓堂詩四首 今存三首

斯堂新構府門東  
炯炯文星聚會同  
導我以仁藩輔重  
永王之國爵名崇  
壁懸四愛清而古  
座列羣英老且雄

積得詩書小天下遼西從此播儒風

其二

是水朝宗必向東萬方文軌總雷同英華筆底世難敵  
豪氣胸中天比崇此日存心希聖哲平生秉志薄驍雄  
儒臣濟濟非云少惟汝承家繼祖風

其三

書齋南構五雲東政教流行遠近同禮樂三千心浹洽  
檻楹四八面穹崇操觚騷客言談古執筆文臣氣勢雄

參透聖賢瀟灑處一襟霽月與光風

與程紀善詩

濟濟新安士今為輔翊臣鳳凰池上客龍虎榜中人  
不獨詩文勝猶兼德行純況承忠孝裔喜得日相親

賜回新安

新安古邑面龍峯之子英才秀所鍾策對皇廷曾獨步  
經明王道孰爭鋒平生好秉忠勤志百職咸推愷悌容  
倏爾拜予歸讀禮令人懷想意忡忡

賜翠眉亭詩

翠眉亭上月如眉水色山光映紫薇石鏡古今風雨滑  
花屏遠近霧烟霏畫分八字蛾彎巧寺崦千重鳳舞奇  
最喜江南春信早老梅開遍向陽枝

賜尚義堂

五常仁義最為先今見卿門得兩全天地一心無世慮  
子孫三代有家傳同行故友能收骨異姓孤兒賴贖田  
積善定知餘慶遠羣山疊疊水綿綿

賜題程氏宗譜詩

洪武紀元六月蒙遼王殿下索取家譜披閱再三乃  
命筆立成一律令羣臣賡賀前韻

重黎譜出自軒轅滾滾源流遠更延忠壯有聲天地老  
子孫無數古今賢故家喬木蟠根大深谷猗蘭奕葉鮮  
上下相承同紀載二千年後萬千年

用方宗儀韻

徽郡程家名望族自周而下爵王公存孤實抗干天義

報國常攄貫日忠德潤風姿人有異光增譜來世無同  
古今具載難窮盡一代強如一代隆

貞白遺稿卷七

欽定四庫全書

貞白遺稿卷八

附錄贈言

寅賓堂序

解縉

遼府在雄邊要域岬夷東表之地今長史程君之為紀  
善也賢王寵之以翰墨寓交修之意誠敬之心篤實之  
辭儆戒洞屬表裏真符且以寅賓名其堂為大書以揭  
之取朝日之義且著其地近岬夷也君子體之緝熙聖



學始終一致因以問其寅罔以日為賓當無時而或怠也昔者仲弓問仁子曰出門如見大賓使民如承大祭先儒釋之曰非因出門使民然後有此敬也蓋未出門使民之時固當常存此敬而既出門使民之後豈可少怠於心哉如見賓也如承祭也常如朝日之時也一毫私欲無自而汨之也此心其猶出日乎程君為賢王之寵錫有年矣賢王忠孝之譽日以洋溢程君克謹其職遂以超擢人未有見程君之忽於言動之間者程公其

善學伸弓者也寅賓取義至約以切非為夸美者比名堂以此最為近古蓋曰欽曰寅皆聖人心法之傳也

寅賓堂跋

王友行

伏讀遼府紀善新安程先生寅賓堂卷竊歎其際遇之深也洪武丙子秋灝氣肅清天宇夷曠殿下親幸先生是堂而從官咸集吾王忘其封建之貴優賜禮遇臣下披誠露悃商確討論相得之情歡如魚水然後載賡載歌從容啟沃雖曰游心吟事而諄諄然寓規戒相成之

道殊非嘲咏之空言也吾王之辭金宣玉應昭回雲漢之章擢於詞藻者或有不逮誠大哉王言也嗟夫在心為志發言為詩吾王勉喻之情發於辭表者若此則寵顧之恩蘊諸中者諒不翅於是矣吁先生何以獲此於君哉夫君臣際遇自昔為難先生得君之厚如是固知慶門餘澤之來遠矣至於輔導以仁永王之國而不負皇祖遺訓不言可知視碌碌輩曳裾竊祿弗克效職者有間矣今雖致政尚懷餘報斯卷殆不特為先生之榮

傳至子姓開卷有益其為榮將有既乎友行獲披誦之  
亦有幸矣先生其寶之

獲寅賓堂詩卷序

歐 嵩

夫名門世家必有聞人以光昭前烈垂裕後昆故傳之  
永久而愈隆也予觀績邑程公彥亨先生譜牒及諸手  
卷則知程公經明王道學有源委探深極玄飽蘊經濟  
之才者也由庠生貢於胄監而對策於大廷魁多士傑  
出羣英遂擢為遼府紀善凡有制作多出先生手尋陞

長史任分茅胙土之佐股肱輔導之責不既嚴且重乎  
而其政聲之美功業之著良有在焉其詩與文蓋不能  
以盡見之然而下筆輒數千百言滔滔不竭長篇短詠  
如不經意亦見其才識有餘之士也所謂李杜文章在  
光燄萬丈長是也一日公暇扁其堂曰寅賓蓋取書之  
日出暘谷肅賓之義淵矣哉王因勸士幸其堂而嘉之  
遂書寅賓二大字賜之於其手卷之端圖篆燦然以冠  
其首復撰賜序文聲詩於其卷後以彰其美開卷誦之

輝映人目茲實君臣明良千載之奇遇也斯卷隨公宦  
遊南北蓋亦有年其後公以事梗雲飛鳥散斯卷遂失  
久歷星霜莫能尋究今從弟彥良不遠萬里之遙歸自  
南土拳拳以家乘為念歎家譜之莫系慨詩卷之莫尋  
惆悵于心久矣今景泰癸酉冬俄爾得斯卷於鄉友之  
處何啻連城之璧照夜之珠彥良喜之不勝一日袖示  
於予願求一言以序之予與彥良交之有素知其忠信  
人也能念本本水源之義說禮樂而敦詩書是亦人道

之大端家乘之本也又能述厥兄之善尋墜緒之美豈  
不傳之永久而隆也哉槐堂宗老孟先生嘗修忠壯公  
及丞相公程氏實錄彥良亦慨捐已貲助其刊梓行之  
已久今得斯卷寶藏於家仍欲繼求名筆賦詠於卷後  
其秉彝尚德之心油然而發見良可嘉也傳曰夫孝者善  
繼人之志善述人之事者也其是之謂歟自今而後繩  
繩相繼愈遠而愈隆愈久而不忘然則寶藏長史公文  
翰及程氏實錄者又自彥良始也其繼此者子子孫孫

以世繼世引而勿替庸有已乎是為序

倡和集序

前人

倡和集者乃前遼王左長史程通彥亭先生之所作也  
先生職居王相任股肱輔導之責不為不重當分茅胙  
土之佐不為不大而政聲之美功業之著固有在焉其  
於公暇之際或作為文章或發為聲詩一以詠窳窳官  
況之情一以鳴國家太平之盛偉矣傑矣非胸中蘊經  
天緯地之文五色琅玕之秀者不能發而為此作也賡



唱迭和長篇短什使人誦之慕之一唱三嘆不忍釋手  
不啻如珠璣錦繡之光輝也公今逝矣其集雖傳錄然  
未能有表章而板行焉予惜公館閣之文而掩於無文  
之地因與公從弟彥良言之彥良遂屬予序以廣其傳  
嗚呼先生之詩文固有不待予而後傳者特晦顯自有  
其時耳後之觀者幸毋忽焉

贈程彥亨宗譜序

胡浚

予因暇日步游寅賓堂覽程氏家譜披閱再三掩卷而

嘆曰盛哉程氏之源流也上自羲軒下至三代漢唐而  
逮於今其間王侯君公大夫師長或以文顯或以武稱  
或定方隅或鎮朝綱或道傳孔孟萬世而不泯者或救  
災捍患廟食百代而不絕者鐘鳴鼎食雖歷代常有變  
遷而程氏子孫與天地相為終始愈久而愈盛者何耶  
古人云發源深者流必遠培根固者枝必茂今程氏子  
孫與天地相為悠久者蓋上世以來高曾祖禰積功累  
仁深根固蒂是以子孫有繁衍綿綿之相繼者宜其然

也茲者迪功郎紀善彥亨與予同寅日久其聰察才能  
特出乎僚案之表其為文也以理為主而不求新奇其  
講解也以道為主而不泥於浮誕源源有自渾渾無涯  
追洙泗之高風同伊洛之正派其事君也洞洞屬屬恭  
勤畏慎其待人也不知物我之有間諸子百家之書聖  
經賢傳之奧有問俱通過目不忘自妙年擢高科登顯  
仕海內之士聞其名而拜下風者有年矣數載以來咨  
詢博訪陳善閉邪以文規諫不持長鎗大劍專以文墨

議論幹旋仁義導賢王於無過之地裨益弘多其事君也忠誠如是其事親也為何如哉自為冑監陳情于闕下以五尺之微軀動九重之聖聽拔祖父於危難之中迎父柩於萬里之外使生者安而死者塋由是觀之忠君孝親之道惟我彥亨為盡之吁賢哉不勝三嘆予畧序梗槩云耳

長史公傳

程敏政

公諱通字彥亨其先自歙篁墩遷績溪程里再遷坊市

祖平素業儒洪武初以鹽法坐繫御史廉其非辜喻其旁引衆人則可免平起對曰某不幸爲人所誣而又誣人欺天矣寧以身待罪御史嗟異竟請成延安有同謫而旅死者平遣子負遺骨歸其家其家以貧故不納又買地塋之伯父以忠洪武庚申用人材舉知潮之程鄉縣有治迹父以誠尤以孝友聞初以忠子泰將省父程鄉以誠與俱中道聞以忠得罪被逮且瘁作偕行者誅泰反走以誠大罵曰汝父坐事正當捐生赴救舍之而

歸獨何心乎遂徒步直前既至而冒瘴死聞者悲之公  
少有至性又得家庭之教動必遵禮嗜學不倦鄉先生  
奇之年十四補縣學生二十二以貢入太學時洪武乙  
丑也丙寅聞以誠喪免歸徒步過嶺迎柩還墓墓已廬  
墓下三年哀慟毀形妻子至不相識戊辰復上太學時  
年已老公上書言臣壯而無父祖猶父也臣祖老而無  
子孫猶子也更相為命今邊徼戍卒如林顧豈少臣祖  
者辭懇切書奏高皇帝憐之而持其章不下私命兵部

驛召其祖既至乃并召公東西立玉階下顧公曰汝識此人否祖孫相持哽咽不能仰視高皇帝嘆曰孝哉若人命兵部除其籍驛送平還鄉庚午秋公以尚書舉應天府鄉試時遣諸王將兵行邊以封建策諸貢士于廷公所對稱旨親擢第一授遼王府紀善卒未從王閱武臨清壬申從之國遼西時王府未建以祖喪免歸復廬墓三年服闋復任未幾高皇帝上賓庚辰從王渡海南還卒已進左長史明年始從之國荊州公悉心輔導王

敬禮之凡一國之事咨焉府中有衛士紀綱者用詔得  
幸公每召而答戒之會文皇帝舉兵靖難遣人至荊州  
公草上封事數千言文皇帝既正大統紀綱者以入賀  
留侍歷官錦衣指揮使被顧問因乘間及封事遂有詔  
械公詣京師簿錄其家公既死家人發戍邊又下續溪  
簿錄其家得确田數十畝遺書數十百卷牯皮數張黃  
希範洪武末先出知徽州府雅與公善至是亦為衛卒  
所捕并籍其家同赴京師而續溪程姓最衆幸使者仁



恕罪止一房餘獲免焉初遼王雅重公命圖其像又錄其世譜親為贊之後十年公異母弟彥迪以事至荊州王召見之語及舊事曰汝欲見汝兄否彥迪頓首不知所對王出遺像示之彥迪哭失聲并請其世譜以歸永樂中有讐家欲訟之者適彥迪他出家人懼而焚其像獨餘其世譜云公初讀書即勵志聖賢之學居常恂恂如有弗逮至臨事則毅然莫能奪故所立如此為詩文不求異而主於理然辭氣超越專工者反不能及有稿

百餘卷悉毀於官宗人敏政曰公歿世既久其遺事絕  
無知者敏政嘗從故老問之得其槩又見公從孫上林  
苑監署丞京於京師因掇拾為傳如右噫公與方希直  
周是修二公同時友善今希直之文梓行於世是修又  
得楊文貞公為之表章獨公事湮沒而無聞此遠宗後  
學所不能自己者歟

遼府左長史彥亨公行狀 程 定

我太宗文皇帝靖難之師奉天東指而金川不守當計

諸臣若方公孝孺齊公泰黃公子澄陳公迪鐵公鉉周公是修下及東越之樵河西之傭補鍋之匠雪庵馮翁銷聲泯迹捐身死難揭諸日月而我從祖長史公與方公孝孺周公是修相友善亦死于遼府公諱通字彥亨貞白其號也舉洪武庚午南畿鄉試績之發科自公始御試封建策擢第一拜遼王府紀善尋進左長史屢人紀綱者每不法公輒痛繩之適文皇帝靖難師興潛使人通遼府公拒之遂上防禦北兵封事數千言備兵入

援及谷王漏師遁還齊公泰慮遼寧二府為變召還京  
師寧王與靖難師合惟公請遼王奉朝命以其兵至京  
師語見齊公傳文皇帝既履瑤圖而紀綱入賀留侍用  
事因乘間及公曩有封事遂有詔械公詣京師論死仍  
錄其家止及本支餘支幸存猶得收公之骸骨而延公  
之蒸嘗至今罔替徽州知府黃公希範坐與公善共議  
條上防禦北兵策同械詣京師死之先是公為太學生  
祖平以老戍邊公念之罔置也乃以陳情表上高皇帝

為之感動即密召平置之殿陛之下俾公認之公見其  
祖即相抱泣高皇帝嘆曰孝哉若人即釋平尺五俾之  
歸其移孝為忠類如此方公之在械也或曰魏徵之業  
可勉也藩府之職微哉眇乎何乃坐受困乃爾公曰在  
孤卿死孤卿在疆圉死疆圉在庶尹死庶尹職有大小  
乎祖平之釋至恩也非此曷以報効而我太祖高皇帝  
可負哉紀綱能死人乎不肖定蓋公之從孫也嘗聞之  
先人曰自公之拒燕使彼不得潛通也文皇帝固已銜

之矣故紀綱之譜易投云定今忝觀政院署得與湛元  
明陸子淵友每與扼腕論公之烈暨諸死事者湛陸曰  
太祖高皇帝與劉文成登金陵之城乃曰其能踰乎文  
成曰必燕之飛乃可爾蓋指燕也炳哉文成之先見乎  
文皇帝其諸承天心以行天罰者乎後乃釋諸死事者  
其拒陳瑛追戮之請命解縉章疏之焚解遠親未弔之  
令孰非我文皇帝之至恩哉今予也以不忘先公而報  
効朝廷茲予忠今上之職分哉不肖定遂乃感泣退而

搜諸革除錄暨遜國臣紀及諸所紀載者乃得公之遺事遂綴而列之命侍史書之寄諸我宗人曰請以是嗣我忠壯公之鴻烈

長史公誄

程容

我成祖文皇帝之秉鉞靖難也而我從祖遼府左長史貞白公死焉蓋大節也方其致命也豈計不朽名哉求無愧此心而已抑其純剛正氣充養完粹一臨大節則定見定力自有卓然不可奪者是宜流風百世砥柱名

節當與天地同不朽其可使之湮沒而無聞耶顧表揚之責誠在我後之人也於是不肖容乃率宗之子弟立椎圖而為之誄誄曰於鑠忠義惟國之基匪死曷就惟心是祇於惟靖難可以勿死勿死而死乃踰於紀紀雖是踰乃曰愚忠愚不可及惟孔之崇振彼海宇齊黃載雄惟湖之樵惟河之傭乃挺厥氣咸守以死猗哉我公長遼之鄙入衛於京乃上封事北防千言乃觸於天乃械而死惟鳧翩翩人孰弗死惟公是騫惟彼日星惟公



之精惟彼河岳惟公之靈千祀載輝精靈載凝惟我新  
都大鄴之疆大啟聖奧乃惟紫陽忠義是揭昭厥玄黃  
人紀載廓精命煌煌惟公是蹈聖哲是標乃懋於學貞  
名是鑣守素惟勁惟履是操祖平遠戎陳情於廷高皇  
曰孝惟成是矜既死于遼文皇曰忠惟厥忠孝惟公之  
隆大倫耿耿匪惟亢宗天地之紀華夏之隆欽祀皇皇  
惟忠之嘉二儀有毀惟忠靡瑕嚴彼大防孚極有嘉人  
道靡禽揭彼流沙嗚呼茂哉鴻烈靡涯

長史公年譜

程伯祥

夫天地光岳之氣獨畀於英賢也豈偶然哉顧時平則  
抱直持正而高義薄層雲時艱則矢志勵貞而堅節炳  
烈日要以能為良臣則必為忠臣此夫仗大義明大倫  
觸時忌而愈奮甘九死而不回談者類以為植於天性  
則然庸詎知其成於邃養者不少也予從祖貞白公諱  
通字彥亨者死事於文皇帝靖難之時迄今凜凜猶有  
生氣每讀遜國臣紀革朝遺忠錄得公遺事益重太息

而酸楚也公性至孝慷慨有大節然資稟穎異嘗隨月讀書至夜分不輟博綜經史善詩文年十四補邑庠弟子員洪武乙丑貢入成均明年丙寅父以誠省伯父於程鄉縣署冒瘴卒於吉安公聞訃徒跣輿視以歸廬於墓側三載銜哀骨立絕跡壺幃而妻子固有見其顏面矣戊辰服闋復上南雍大司成得公卷牘亟加稱賞每置六館諸生高等然一本之念惺惺不忘恒念父雖獲首丘於梓里而大父平公猶然謫戍於延安西風淒如

日九迴於腸而痛切也因陳情上書云臣壯而無父祖  
猶父也臣祖老而無子孫猶子也辭極懇切高皇帝憫  
之潛命兵部驛召其祖與公立墀左右顧公曰汝識此  
人否公乃伏視哽咽淚下如雨高皇帝嘆曰孝哉若人  
命兵部除其籍釋之寧家又明年庚午當大比士公由  
太學領南畿鄉薦時遣諸王將兵行邊御試封建時務  
策諸貢士公對以宗藩之臣權勿假之太重如漢七國  
亦勿制之太輕如唐末造策對稱旨擢至第一除遼府

紀善公悉心輔導王加禮敬為作寅賓堂賦詩以美其勩辛未王閱武臨清公從之未幾以祖喪免歸公哀慟狀毀如喪厥考三年起復原任會高皇帝賓天而公從王渡海南還蓋庚辰歲也辛巳銓司考最進公左長史贈父以誠如公官母汪氏為宜人皆特恩也公在遼府敷歷十餘年開誠布公始終一致以故王寵眷益優諸凡國事悉咨詢焉府有儉人紀綱者梗法恣橫公箠斥之不少讓適文皇帝舉兵靖難使至荊州公上防禦北兵

封事數千言文皇帝御極之元年紀綱入賀留侍扈從  
乃銜故隙諧公封事遂有詔械公詣京師死之且夷其  
二子而簿錄其家先是公遊南雍時與方公孝孺黃公  
觀練公子寧卓公敬周公是修陳公彥回諸君子相友  
善後下詔獄而公亦與諸公並死事焉嗟嗟悲乎取義  
存仁在三之制士無全節誰負劉賜惟公忠節天成有  
死無二釋祖戊而上言李密之陳情也甘繫囚而駢戮  
韓通之死節也時遭靖難之師力為殉國之舉他日文

皇帝亦云彼食其祿自盡其心嗣是嚴禁漸開渥恩漸  
被固知忠義之在人心未嘗泯沒而褒表崇祀則又聖  
祖勸忠之遠慮也於時方公孝孺之死論者比之夷齊  
愚謂通公之節似乎孝孺其時同其遇同而忠貞之心  
亦同予悲其感發於典墳而不負所學者耶予幸其耿  
光於奕世而不愧汗青者耶

長史公像贊

汪溥

詩豪李白文度昌黎孝全祖禰忠篤天彝我我輦山悠

悠乳溪偉哉令聞水遠山齊

長史公像贊

有小序

程 輅

我從祖貞白公為遼王府長史死於靖難初遼王雅重  
公圖其像親為贊之後十年公弟彥迪至荊州王召見  
之語及舊事曰而欲見而兄耶彥迪不知所對王出遺  
像視之彥迪失聲請之以歸歲時展之儼然若生乃復  
載拜贊之以附諸末

贊曰睹而冠其王臣之冠乎瞻而服其王臣之服乎究



而像其親王之遺乎日月星辰其公忠孝之精乎河海  
山嶽其公忠孝之形乎何事於繪得其像弗得其心像  
遺於王乃得其心因綴其精嗟乎王之心其太祖高皇  
帝之心乎公之像其太祖高皇帝所植之身乎嗟哉名  
流天壤典卹無疆其成祖文皇帝玉成之恩乎

貞白遺稿卷八

欽定四庫全書

貞白遺稿卷九

附錄贈言

敬和寅賓堂詩韻

胡浚

分封藩國海西東民物熙熙太古同義理仁恩資教育  
文章道德要修崇人臣喜遇千年慶吾主當為百代雄  
室小有名天地濶儒林今已振文風

又

吳鼎

翼翼新堂南道東每因朝罷盍簪同邇遐共覩文章盛  
上下咸將禮樂崇扁錫寅賓書畫健詩頌紀善措詞雄  
微臣叨忝司儀職際遇明時復古風

又

項澂

寅賓堂啟廡南東文運宏開樂大同王國人材南北盛  
聖經賢傳古今崇瞻依有分身忘老唱和無才氣借雄  
珍重新安程紀室能施化雨播仁風

又

張仔

名堂新構府門東，高扁寅賓際會同。  
上國文章爭富麗，明時禮樂喜修崇。  
人心期與天心合，士氣驚誇膽氣雄。  
共沐恩波忘爾汝，經筵無日不春風。

又

汪伯琛

寅賓堂第面天東，鶴駕時臨冕紱同。  
賈傅蘊才誠卓絕，楚筵設醴備優崇。  
綸章典麗詞源永，珍扁昭回筆勢雄。  
憑仗寶藏賢從季，令人覽卷仰英風。

題寅賓堂詩

黃觀

暉暉初日上扶桑正照先生新構堂  
高捲簾櫳迎曙色  
洞開窗戶納晴光  
山頭雨過琴書潤  
海面風來枕席涼  
樂此昇平何以報  
願陳忠孝輔賢王

又

卓敬

日出扶桑表堂依遼海東影浮疎綺外  
光映赤心中寅  
畏瞻依久恩榮寵錫隆  
願持終始志佳譽藹無窮

又

陳彥回

王者賓臣古所難  
驚看盛事出人間  
風雲義洽金蘭契

雨露恩深玉筍班  
兩字龍香揮寶翰  
十年燕寢著華顏  
宗藩輔弼將何補  
報德惟應竭寸丹

又

曹 鑒

海東開國有賢王  
好道崇儒樂俊良  
三島雲霞資翰墨  
一天星斗煥文章  
高堂華扁名何幸  
異數恩榮世不常  
魚水君臣古來少  
願言千載鎮藩方

又

陳 昭

銀河清淺曙光分  
驚見朝暾映五雲  
心接太虛嚴敬畏

禮嚴暘谷儼思存堂成已沐賢王幸案積俄延故友論  
況際聖明全盛日君臣相遇重斯文

又

張遜

啼徹金鷄萬里音曙光纔連肅朝簪扶桑未上三竿日  
葵藿先傾一寸心光寵祥龍華蓋近影搖威鳳彩雲深  
贊襄好盡藩垣職永保斯堂亘古今

又

戴冕

哲人慕聖學而以敬自持萬物未與接湛然儼若思出

門見大賓所敬繞有施寅賓揭華扁取義良在茲天宇  
俯夷曠朝日揚光暉試登寅賓堂載詠寅賓詩勉旃慎  
終始此心長無違

又

劉現

明時藩府萃儒臣羨子論文意獨親良夜扣門非俗客  
清風拂座總嘉賓幾冠博帶威儀盛繪句絺章唱和頻  
華扁共看恩寵在賢王書法映秋旻

又

汪靜齋



聖君分命在岷夷新構祇今扁作題義合已蒙賢主幸  
禮同應與古人齊琴書滿架雲光潤竹樹當簷海氣迷  
況有卷端文與字珍藏世世耀羣黎

獲寅賓堂詩卷

歐 嵩

一軸寅賓卷多年去復來篇篇輝錦繡字字燦瓊瑰筆  
洒賢王翰文褒長史材幸今回趙璧深慙後人懷

又

馮 靖

山川鍾秀產英良出輔明時國運昌堂構寅賓遼海上

職專藩傳講筵傍雄文特賜宸恩重華扁親書寶翰香  
手卷即今傳從弟有時開誦煥雲章

寅賓堂辭

三章

彭延

明明兮晨暾浴咸池兮麗天門天為大兮日為之尊清  
明在躬兮夜氣孔存延接以禮兮容貌是溫昭回萬里  
兮下照覆盆永灼堂構兮五色續紛

大明兮麗天六龍既駕兮羲和是鞭若人敬禮兮寸心  
秉虔雞人唱曉兮擊鼓淵淵平秩東作兮生意紛然太

和一氣兮駐爾長年

朝陽兮煜煜拂扶桑兮徘徊若木明東方兮曰暘谷敬  
之敬之兮冠裳肅肅助神功之亭毒兮調四時之玉燭  
秉寸度以旦旦兮錫爾躬之百福

獲長史公詩卷感賦

馮靖

我羨奇哉程長史學問精深有源委工夫博約極玄微  
度量誰能窺涯涘輝輝文彩貫虹霓出輔賢王有經濟  
府東構館號寅賓會聚昂昂縉紳士於斯暇日談古今

何異唐賢登瀛意賢王重道禮儒臣勸士幸游館中地  
不惟優寵賜詩文又為卷端書大字天章寶篆燦雲霞  
官樣文章駭人世長篇短詠滿華箋盡是英賢吐經緯  
官遊南北卷長隨一旦歸來俄失志星霜久歷嘆難尋  
萬里南歸有其弟詩文譜牒卷咸修斯卷得之鄉友處  
如歸趙璧喜無涯復徵名筆昭其懿我今展誦為長歌  
深愧才難發幽趣家聲忠壯慶源長奕葉簪纓前後繼  
新安十室九為程俯仰宗先有先霽還君此卷甚珍藏

世世相承傳厥裔

敬和題程氏宗譜詩韻

胡浚

廣平分派向南轅便有支流萬載延武繼孫吳真不忝  
文傳孔孟最多賢嘉名久播乾坤大盛德流芳日月鮮  
子子孫孫承祖代河山帶礪共長年

又

吳鼎

分符南徙不回轅賜第新安系益延命世有人皆顯爵  
名家無代不生賢重重最喜青氈舊若若多存錦綬鮮

如此高門今幾見親王褒寵萬斯年

又

項以清

南居徙定北來轅族譜支流衍慶延簪紱朝朝增貴顯  
文章代代啟英賢新安及第甲科勝忠壯起家名譽鮮  
出處有成吾道長江東遼右樂天年

又

程富

當年五馬駕南轅忠壯神明派久延廟食顯靈昭日月  
山川鍾秀產英賢武諳韜略風雷迅文爛雲章錦繡鮮

愈出愈奇來盛裔青山綠水與齊年

又

方儀

五馬東來北駐轅高風寥廓族綿延垂光開府昭終古  
分胄河南著二賢家乘流傳三世葺王章褒寵五雲鮮  
至今乳水簪纓盛遺澤悠悠自有年

貞白遺稿卷九

欽定四庫全書

貞白遺稿卷十

附錄贈言

送友程彥亨從王渡海朝京 方孝孺

送卿南浦草萋萋  
風滾楊花趁馬蹄  
戀闕心馳紅日近  
思親望入白雲低  
短長亭上杯行酒  
南北江頭水拍堤  
准擬明年春二月  
蒲帆高掛上遼西

送程彥亨朝京

舒頔



雨浥輕塵宿霧收朝京無計為君留蘆花飛絮千山曉  
桂子飄香八月秋鯤蛇鵬搏神變化雲龍風虎自相投  
此行好奏平戎策喜動天顏十二旒

又

舒遜

山城八月桂花開摘贈才人上鳳臺  
詣闕慣騎千里驥離筵勸飲兩三杯  
朝回何處之官去公暇題封寄鴈來  
握手臨歧無別囑好敷聖澤及蒿萊

又

方玄成

慈親送子上神州手線踈踈不忍綢但囑公勤奉王事  
北堂萱樹自忘憂

寄程彥亨惠白竹紙

余舜卿

送別睂亭又一年倚樓千里共嬋娟日趨瑣闥躋清要  
夜秉金蓮理舊編每憶雄文槁彩筆忽飛雲朵寄霜箋  
自憐衰老栖林下無計樞趨到日邊

贈升堂拜祖圖

鄧從道

程門孫子最知幾王府賓師世所稀玉珮曉寒趨上國

錦衣春暖拜重闌綺羅席上金魚滿瑪瑙盤中紫蟹肥  
為壽豈無黃太守也攜尊酒候柴扉

又

黃飛

尚義堂前有孝孫潁川治最也登門白頭賢叟稱鄉長  
綠鬢忠臣荷聖恩千古歌詩鳴雅頌一時稱壽酬芳樽  
文章太守來嘉勉愈見光先裕後昆

又

汪道

王府還鄉有順孫文章郡守踵名門此時不計官為貴

行禮須知祖是尊壽筭重闌詩滿卷懽生綺席酒盈樽  
主賓忠孝俱無忝遐邇從茲薄俗敦

又

唐員

朔風鼓嚴寒冰霜感時叙忽聞來遠省馬嘶繫庭樹鄉  
間笑喧呼相見歡相聚高堂白髮翁坐談問侍御因得  
賢侯至斯文重相遇怡然拜庭幃美意徵圖序圖中翰  
霧深恍然起祥瑞

凌河送別程彥亨詩

韓恕

霜落楓林葉漸稀  
凌河攜手話分離  
沙頭羣散鴻飛遠  
塞上人還馬去遲  
戀主感恩頻北顧  
思家望母獨南歸  
知君忠孝為心事  
肯負陽春雨露期

又

項以清

贊襄藩國四年餘  
祿養高堂一旦違  
孝子痛深恒永慕  
仁君恩重賜遲歸  
憂勤王事如家事  
感嘆麻衣當錦衣  
暫別秋風休涕淚  
從來春日倍光輝

又

吳鼎

衣錦歸時鬢未絲倚門望久倍懷思  
豈知三月平安信翻與孤兒永別期  
化日明心真可喜秋風分手漫成悲  
到家自是憂君切可忍堂陰見斷機

又

朱恢

萍水相逢四載餘凌河執別漫踟躕  
已知帝闕披陳策又向王門侍講書  
臣職盡共思報効君心相契喜何如  
豈期萱草成哀謝淚洒西風滿客裾

又

毛鏞

慈闈失恃達遼東哀慟無聊兩地空反哺啼鳥虛夜月  
傳書怨鶴苦秋風思深瀚海恒思念泣向旻天未感通  
輔導親王膺托重精誠貫日決宸衷

又

童正蒙

寫就凌河送別圖正當別處又踟躕本期事主臣藩國  
豈料喪親反里閭古薊秋風嘶駿馬新安夜雨泣慈烏  
懸知塋祭重來後還見葵花白日初

又

王用才

見公已是兩年餘藥誨從茲不敢違正擬忠君同列侍  
忽輒喪母獨言歸今朝送別詩盈卷後夜相思淚滿衣  
顧我譚才真感激春風回首更增輝

又

蕭文英

道統由來自洛川承家何幸得英賢深知夙夜勤王事  
不憚春秋侍講筵聞訃蒼黃悲母逝辭朝眷戀感君憐  
此行莫灑臨歧淚孝意忠誠已兩全

又

曹鑑



正好厘王事還家奉母喪令人多感慨倚杖獨徬徨羨  
子孝能盡為臣忠肯忘男兒有如此何往不輝光

又

程君南赴為親喪時值初冬梅正芳躋踊弗勝哀老母  
歎歎難忍別親王海虞敝屋思如願吳郡麥舟助未遑  
分袂長亭約重會明年月桂散清香

又

方儀

脫却華簪著素冠曉辭丹闕暮江干深嗟厚祿酬恩未

慟哭慈親見面難  
馬躍緩馳淵上路  
舟行勤問月中灘  
終裏莫作毛生隱  
帝子須君問治安

又

石屋山人

把袂臨流思有餘  
君心留戀忍輕違  
政如在水魚同樂  
誰擬鳴陽鳳獨歸  
荻雨悲添徐庶淚  
蘋風愁絕老萊衣  
披圖日想恩波濶  
還見迴翔覽德輝

送程彥亨服闋赴京

舒士謙

寸草春輝志未酬  
束書又上帝王州  
龍江潮落三山曉

蟾窟風高八月秋丹陛春容仙仗肅卿雲繞繚袞龍浮  
書生奏罷長楊賦騎馬看花取次遊

又

方玄成

三山高枕大江流天入蒼茫東日浮龍出曉分吳峽雨  
鴈來霜帶海門秋香騰黼扆清光近星落觚稜曙靄收  
此日風雲重慶會定將經濟贊皇猷

送程彥亨江西奉父喪

汪仲魯

披野寒雲凍雪飛孤兒苦淚每沾衣親喪遠寓西江上

丹旄翩翩幾日歸

其二

素服間闕踏雪來芙蓉驛畔早梅開  
不辭千里西江遠春滿鄱湖一棹回

又

羅存誠

呼天號地淚成河扶柩文江孝感多  
萬里雲濤從拍岸千山風木自鳴柯  
每懷進養悲羊棗那忍開編誦蓼莪  
丹旄翩翩烟水際不堪矯首些哀歌

又

舒士謙

哀哀孤子倍思親痛裂肝腸淚滿巾  
正好觀光遊上國不堪聞訃別成均  
心懷寸草恩難報恨抱終天怨莫伸  
奉養不辭千里外恓恓純孝達楓宸

輓長史公

汪伯璫

玉樹冰壺竄出塵  
羣山乳水萃精英  
英文數妙理先多  
士表達深情感大廷  
幽邱日斜悲賦鵬  
長江月冷醉騎鯨  
弘才未展經綸用  
恒使知音恨不平



貞白遺稿卷十

跋

我先長史貞白公生平所為文夥矣遭難而後始泯焉  
無傳也間藏片楮復讐於禁而重秘之猗歟忠孝遺文  
不光後世其何觀焉伯祥系托宗祏自惟謏劣居恒以  
不能張公為歎幸從網解之餘時獲緒言而雜出不倫  
保無終化烏有乎因集先後所採者以壽諸梓而竊綴  
一言於紹末伯祥惟人貌文名揆藻摘華汗牛充棟聽  
睹一時足侈追歿而靡不興其人俱銷沈也乃今公往



矣而睠茲遺言猶凜凜有生氣何哉是蓋公之存固身  
植大節而以其人為文即公之亡亦世拂餘風而以其  
文為人以文為人而見公之為人於公之為文矣嗚呼  
公寧有生死哉公寧有生死哉嘉靖庚子春奉議大夫  
福建建寧府同知從孫伯祥頓首謹跋

叙貞白遺稿後序

長垂髻時從先君苑監公官京師每聆先君與敏政公  
談從祖貞白公死節事及陳情表封事疏皆悰悰之吐  
露則未嘗不歎歔太息而流涕也蓋公由貢舉御試第  
一官至遼府左長史入冑監陳情乞祖而高皇眷其孝  
居藩府疏防北兵而建廟諒其忠以至夾輔天潢藩屏  
王室則精白一心蓋天植也會文皇帝興靖難之師一  
時當寄諸臣昧齒剛舌柔之戒者靡不以達權通變為

言而保有榮祿乃公以一介藩臣又非三事當寄者埒  
顧獨以君父大義高皇特恩並等於天地侵假脂韋光  
寵而偷以全生如大義何如皇恩何維是與方黃周練  
諸君子觸忌諱甘斧鑕殺身夷族而不悔此其忠孝大  
節迄今耿耿乎猶有生氣者矣惜也公之奏議詞章幾  
百十卷悉遇革除而竟為雲飛鳥散每令人扼腕而痛  
恨於是偕從姪伯祥輩旁搜博訪得若干首裒而輯之  
併所家藏彙成一帙分為六卷題曰貞白先生遺稿而

卷末則以藩王寵翰英賢贈言附焉於戲休茲良不偶  
矣錄成將見琳琳琅琅輝映簡編而公之手澤復昭於  
世寧不猶辟結綠而含輝殘懸藜而耀色也乎哉若公  
忠節具載遜國臣紀革朝遺忠錄矧今朝議已定而褒  
忠錄後之卹典是在俟來焉公諱通字彥亭貞白其別  
號云嘉靖壬子歲季夏從孫長頓首謹敘

